

UMÛMÎ KONGRE BEYÂN-NÂMESİDİR

Sivas
11 Eylül sene 335

Bütün milletçe ma'lûm olan mehâlik-i hâriciyye ve dâhiliyyenin tevlîd etmiş olduğu intibâh-ı millîden doğan Kongremiz mukarrerât-ı âtiyeyi ittihâz etmiştir:

1- Devlet-i Aliyye-i Osmâniyye ile Düvel-i İ'tilâfiyye arasında mün'akid mütareke-nâmenin imzâ olunduğu 30 Teşrîn-i evvel 334 târîhindeki hudûdumuz dâhilinde kalan ve her noktası İslâm ekseriyyet-i kâhiresiyle meskûn olan memâlik-i Osmâniyye aksâmı yek-dîğerinden ve câmia-i Osmâniyye'den gayr-ı kâbil-i tecezzî ve hîçbir sebeble iftirâk etmez bir küll teşkîl eder; memâlik-i mezkûrede yaşayan bi'l-cümle anâsır-ı İslâmiyye yek-dîğerine karşı hürmet-i mütekâbile ve fedâkârlık hissiyâtıyla meşhûn ve hukûk-ı ırkiyye ve ictimâiyyeleriyle şerâit-i muhîtiyyelerine tamâmıyla riâyet-kâr öz kardeşirler.

2- Câmia-i Osmâniyyenin tamâmiyyeti ve istiklâl-i millîmizin te'mîni ve makâm-ı muallâ-yı hilâfet ve saltanatın masûniyeti için Kuvâ-yı Milliye'yi âmil ve irâde-i milliyyeyi hâkim kılmak, esası kat'îdir.

3- Memâlik-i Osmâniyyenin herhangi bir cüz'üne karşı vâki' olacak müdâhale ve işgâle ve bi'l-hâssa vatanımız dâhilinde müstakil birer Rumluk ve Ermenilik teşkîli gâyesine ma'tûf harekâta karşı Aydın, Manisa, Balıkesir cebhelerinde mücâhedât-ı milliyyede olduğu gibi müttehiden müdâfaa ve mukâvemet esâs-ı meşrûu kabûl edilmiştir.

4- Öteden beri aynı vatan içinde birlikte yaşadığımız bi'l-cümle anâsır-ı gayr-ı müslimenin her türlü müsâvât-ı hukûkiyyeleri tamâmıyla mahfûz olduğundan, anâsır-ı mezkûreye hâkimiyet-i siyâsiyye ve muvâzenet-i ictimâiyyemizi ihlâl edecek imtiyâzât i'tâsı kabûl edilmeyecektir.

5- Hükûmet-i Osmâniyye bir tazyîk-i hâricî karşısında memleketimizin herhangi bir cüz'ünü terk ve ihmâl etmek ıztırârında bulunduğu takdîrde makâm-ı hilâfet ve saltanatla vatan ve milletin masûniyet ve tamâmiyyetini kâfil her türlü tedâbîr ve mukarrerât ittihâz olunmuştur.

6- Düvel-i İ'tilâfiyyece mütâreke-nâmenin imzâ olunduğu 30 Teşrîn-i evvel sene 334 târîhindeki hudûdumuz dâhilinde kalıp azîm ekseriyyet-i İslâmiyye ile meskûn olan ve harsî ve medenî fâikiyeti Müslümânlarla ait bulunan vahdet-i mülkiyyemizin taksîmi nazariyesinden bi'l-küllîye ferâgatle bu topraklar üzerindeki hukûk-ı târîhiyye, ırkiyye, dîniyye ve coğrâfiyyemize riâyet edilmesine ve buna mugâyir teşebbüsâtın ibtâlîne ve bu sûretle hak ve adle müstenid bir karâr ittihâz olunmasına intizâr ederiz.

7- Milletimiz insânî, asrî gâyeleri tebcîl ve fennî, sînâî ve iktisâdî hâl ve ihtiyâcımızı takdîr eder. Binâen-aleyh devlet ve milletimizin dâhilî ve hâricî istiklâlî ve vatanımızın tamâmiyeti mahfûz kalmak şartıyla altıncı maddede musarrah hudûd dâhilinde milliyet esâslarına riâyet-kâr ve memleketimize karşı istîlâ emeli beslemeyen herhangi devletin fennî, sînâî, iktisâdî muâvenetini memnûniyetle karşılırsınız ve bu şerâit-i âdile ve insâniyyeyi muhtevî bir sulhun de âcilen takarrürü selâmet-i beşer ve sükûn-ı âlem nâmına ehass-ı âmâl-i milliyyemizdir.

8- Milletlerin kendi mukadderâtını bi'z-zât ta'yîn ettiği bu târihî devirde hükûmet-i merkeziyyemizin de irâde-i milliyyeye tâbi' olması zarûrîdir. Çûnki: İrâde-i milliyyeye gayr-i müstenid herhangi bir hey'et-i hükûmetin indî ve şahsî mukarrerâtı milletçe mutâ' olmadıktan başka hâricen de mu'teber olmadığı ve olamayacağı şimdiye kadar mesbûk ef'âl ve netâyic ile sâbit olmuştur. Binâen-aleyh milletin içinde bulunduğu hâl-i zucret ve endîşeden kurtulmak çârelerine bi'z-zât tevessüle hâcet kalmadan hükûmet-i merkeziyyemizin Meclis-i Millî'yi hemen ve bilâ-ifâte-i ân toplaması ve bu sûretle mukadderât-ı millet ve memleket hakkında ittihâz eyleyeceği bi'l-cümle mukarrerâtı Meclis-i Millî'nin murâkabesine arz etmesi mecbûrîdir.

9- Vatan ve milletimizin ma'rûz olduğu mezâlim ve âlâm ile ve tamâmen aynı gâye ve maksadla vicdân-ı millîden doğan vatanî ve millî cem'iyetlerin ittihâdından mütahassıl kitle-i umûmiyye bu kere "*Anadolu ve Rumeli Müdâfaa-i Hukûk Cem'iyeti*" unvânıyla tevsîm olunmuştur. Bu cem'iyet her türlü firkacılık cereyânlarından ve ihtirâsât-ı şahsiyyeden külliyyen müberrâ ve münezzehtir. Bi'l-cümle Müslümân vatandaşlarımız bu cem'iyetin a'zâ-yı tabîiyesindendirler.

10- Anadolu ve Rumeli Müdâfaa-i Hukûk Cem'iyeti'nin 4 Eylül sene 335 tarihinde Sivas şehrinde in'ikâd eden Umûmî Kongresi tarafından maksad-ı mukaddesi ta'kîb ile teşkilât-ı umûmiyyeyi idâre için bir (*Hey'et-i Temsîliyye*) intihâb edilmiş ve köylerden vilâyet merkezlerine kadar bi'l-cümle teşkilât-ı milliyye takviye ve tevhîd olunmuştur.

UMÛMÎ KONGRE HEYETİ

**RUMELİ ANADOLU MÜDÂFAA-İ HUKÛK CEM'İYETİ
NÂMIYLA CEM'İYET NAKLETMİŞTİR**

11 Eylül 335

- * MUSTAFÂ KEMÂL
- * HÜSEYİN RAÛF
- * Erzurum Meb'ûsu RÂİF
- * Trabzon Meb'ûsu İZZET
- * Trabzon Meb'ûsu SERVET
- * Erzincanlı Şeyh HÂCÎ FEVZÎ
- * Beyrût Vâlî-i Sâbıkı BEKİR SÂMÎ BEY
- * Bitlis Meb'ûsu SA'DULLÂH
- * Mutki Aşîret Rüesâsından HÂCÎ MÛSÂ BEY
- * Erkân-ı Harb Mîralaylığından Mütেকâid VÂSİF
- * Bitlis Vâlî-i Sâbıkı MAZHAR MÛFÎD BEY
- * Ankara Meb'ûsu ÖMER MÛMTÂZ
- * Ankara Meb'ûsu HUSREV SÂMÎ
- * Mutasarrıf-ı Sâbıklardan HAKKÎ BEHÎC
- * Niğdeli RÂTİB-ZÂDE MUSTAFÂ

Tarih Vesikaları Dergisi'nden (C.1, S. 1, Haziran 1941) alınarak Prof. Dr. Recep TOPARLI tarafından Latin harflerine aktarılan yukarıdaki metin tarafımızdan incelenmiştir. 10.07.2014

Prof. Dr. Recep TOPARLI

Prof. Dr. Âlim YILDIZ

Prof. Dr. Ömer DEMİREL

Prof. Dr. Galip EKEN